

Kelantan hargai komitmen PM teruskan projek infrastruktur

Kerajaan negeri junjung tinggi semangat Federalisme demi kebajikan rakyat

Oleh Hidayatidayu Razali
bhnews@bh.com.my

Kota Bharu: Kerajaan Kelantan menyambut baik dan menghargai komitmen Perdana Menteri, Datuk Seri Anwar Ibrahim, untuk meneruskan beberapa projek pembangunan infrastruktur untuk kesejahteraan rakyat ketika melawat negeri ini, kelmarin.

Menteri Besar Kelantan, Datuk Mohd Nassuruddin Daud, berkata antara pengumuman Perdana Menteri adalah komitmen meneruskan pelaksanaan projek te-

batan banjir, bekalan air bersih dan masalah bekalan air kepada pesawah.

Katanya, pengumuman lain adalah bagi menampung kos projek Pusat Dialisis Yayasan Sultan Kelantan Darul Naim sebanyak RM8 juta dan menambah baik Pasar Siti Khadijah di sini, sebanyak RM5.5 juta.

"Semangat Federalisme hendaklah sentiasa dijunjung tinggi dalam memastikan kebajikan rakyat terus diberi keutamaan dan ia adalah kunci kepada pembangunan berterusan dan kesejahteraan rakyat.

"Kerajaan Kelantan komited akan terus mengamalkan budaya politik matang dan sejahtera serta sentiasa terbuka kepada kerjasama yang membawa manfaat kepada negeri tanpa mengira perbezaan politik, selagi ia selaras dengan prinsip 'Membangun Bersama Islam' yang menjadi dasar pentadbiran negeri," katanya menerusi satu kenyata-

an di laman Facebooknya semalam.

PM umum peruntukan

Justeru, Nassuruddin melahirkan penghargaan dan terima kasih kepada Perdana Menteri atas kunjungan dan lawatan kerja ke Kelantan sempena pengurniaan Darjah Kebesaran daripada Sultan Kelantan, Sultan Muhammad V.

Kelmarin, Perdana Menteri ketika mengunjungi Pasar Siti Khadijah, mengumumkan peruntukan tambahan RM5.5 juta bagi penambahbaikan infrastruktur lokasi tumpuan itu bagi projek membabitkan aspek kebersihan, tandas, baik pulih bumbung dan sistem pendawaian.

Anwar juga mengumumkan yang Kerajaan Persekutuan bersejua memperuntukkan sejumlah RM8 juta bagi membina dan menyiapkan Pusat Dialisis Yayasan Sultan Kelantan Darul Naim.



Anwar ketika bertemu Mohd Nassuruddin di Kota Bharu.

(Foto Ihsan FB Mohd Nassuruddin Haji Daud)